

DU VILAIN

QUI DEVINT RICHE ET PUIS POVRE.

Bien s'essauce qui s'umilie,  
Et cil qui en orgueil se lie  
Et essauce par son bobant,  
Fortune li vient au devant  
Qui l'abat à son mal éur,  
Quant il miex cuide estre astéur.  
Quant de plus haut est trebuchiez,  
De tant est-il plus damagiez.  
Si est fox qui par orgueil monte  
Là dont il descent à sa honte.  
Diex qui tout puet et Diex à qui  
Toute rien s'encline, venqui  
Par humilité simplement,  
Si avoit-il certainement  
Force et pooir de cels honir  
Qui en croiz le firent fenir.  
Mès à ce ne béons-nous mie,  
Qu'en nos n'a pas de bien demie;  
Ainz sommes nice et orgueilleux,  
Seurquidé, fel et desdeignex,  
Et cuidons bien par nos bobans  
Miex valoir que ne fist Rollans,  
Par les pechiez qui si nos grievent,  
Qui les oilz et les cuers nos crievent.  
Tant com Diex nos fet sa bonté  
De richeces et de santé,  
De li servir ne nos sovient:  
Quant povreté ou mal nos vient,  
Si sommes douz, simples, pitous,  
Tout autresi comme li leus,  
Quant il est el piège chéuz,  
Et il voit qu'il est détenuz;  
Lors est si ataint et si pris  
De ce qu'il se voit entrepris,  
Q'un lievre les oilz li treroit  
Que jà ne se revengeroit;  
Et quant fortune le délivre,  
Et el bois se voit à délivre,  
Si fet touz mal et riens ne doute

Devant qu'el piège se reboute.  
Autel poons dire de nous,  
Cruel sommes comme li lous;  
Car Dieu ne homme ne doutons  
Devant qu'el piège nos boutons.  
Mès autrement ira, ce cuit,  
Encontre vezie recuit.  
Dès qu'il connoist nos mesprisons  
Dont recroire ne nos volons,  
Mal guerredon nos en rendra,  
Quant en son piège nos tendra.  
Quant il vodra, bien le sachiez,  
Pris i serez et trebuchiez;  
Amendez-vos, vos qui savez  
De verité que tort avez,  
Ainz que Diex por conter vos mant,  
Et qu'à sa commande vos mant.  
De lui vient quanque nos avons,  
Et pain et vin dont nous vivons:  
Adonc di-ge par jugement  
Que chascun le doit bonement  
Servir de cuer et de richece,  
Quant tout nous vient de sa largece.  
Qui ne le sert bien quiert sa honte.  
Ci après vos commens un conte  
Qui mout fet bien à escouter  
Por les cuers orgueilleux mater.

Dui paisant jadis estoient  
Qui de busche vendre vivoient:  
Mout furent de povre conquest,  
Mès Diex qui les povres genz pest,  
De pou de bien les sostenoit.  
Si com à tex genz convenoit.  
Qui povres est de toutes riens,  
Mout li est granz li petiz biens.  
Li petiz biens en gré prenoient  
Qui des granz biens rien ne savoient.  
Asne avoit chascun et un bois  
Qui pas ne leur ert en défois;  
Touz les jors leur asnes chargoient,  
Et si apareillié estoient,  
Que de leur somme li asnier  
N'avoient que sisain denier.  
Mesonnete et femme ot chascun,  
Et filz et fille avoit li un,  
Si qu'assez plus li convenoit  
Qu'à celui qui enfanz n'avoit.  
Plus volentiers en gaaigna

Et à son pooir espargna  
 Por ses deus enfanz uluchier,  
 Que chascun si a le sien chier  
 Por qu'il soit de bone nature,  
 Et Diex het qui se desnature.  
 Tozjors ensemble el bois aloient,  
 Et ensemble s'en reperoient  
 Comme voisin qui s'entr'amerent.  
 Lonc tens ceste vie menerent,  
 Tant qu'il furent alé un jor  
 El bois por fere leur labor:  
 Si chéi cele matinée  
 Une noif et une gelée  
 Qui les greva si qu'il ne porent  
 Laborer por la froit qu'il orent:  
 Li uns s'efforça demanois  
 Tant qu'il ot sa charge du bois.  
 Cil qui les deus enfanz avoit,  
 Por le froit qui tot le grevoit,  
 Ne pot tenir sarpe en sa main,  
 Ainz les tint andeus en son sain.  
 Cil qui ot chargié s'en torna  
 Et cil qui remest s'atorna  
 Por sarper, mès œuvre ne fist,  
 Et tant qu'à soi dementant dist:  
 Las! que porrai-je devenir  
 Qui onques ne poi avenir  
 A avoir un seul jor de pès?  
 Ne je ne cuit pas que jamès  
 Puisse avoir ne repos ne ese:  
 Por ce pri-ge que à Dieu plese  
 Que ma fin et ma mort soit près,  
 Mès que ainçois soie confès.  
 Vilain esgaré, vilain las,  
 Vilain qui es et qui n'es pas,  
 Voirement voir ne vi-je mie  
 Que je languis en ceste vie,  
 En vie qui à nul ne plect:  
 Dure est l'eure que vilain nest.  
 Quant vilain nest, si li nest paine  
 Qui à confusion le maine;  
 A confusion sui menez  
 Comme vilain viex et penex,  
 Plein de soufrete et plein d'ennui,  
 A géuner me covient hui,  
 Et toute ma mesnie o moi;  
 Dont plus me dement que de moi.  
 Mi enfant, ma femme, ma beste

Le savent bien quant il est feste,  
 Ou quant je ne puis gaaignier,  
 Car il n'ont cel jor que mengier.  
 Si comme fortune se paine  
 De querre mon duel et ma paine,  
 Et tuit à mon gaaing s'atendent,  
 Et mi enfant les mains me tendent  
 Qui pleurent et muerent de fain,  
 Se je n'ai ne paste ne pain,  
 Si que pitié le cuer me part;  
 Et leur mere vient d'autre part,  
 Qui m'assant et ledenge et lime  
 Comme femme qui tozjors lime;  
 Et je las qui sui enchéus,  
 Sui comme li cos empléus,  
 Chiere encline com afolez  
 Et comme li mastin foulez.  
 Por ce requier à Dieu la mort,  
 Car ceste soffrete m'amort.

Que qu'einsi s'aloit dementant,  
 Et son pis de ses mains batant,  
 Une voiz li vint près de lui  
 Qui lui dist: Qui es-tu? Je sui  
 Un viel, un las, un esgaré,  
 Qui en faute de bien fui né,  
 Li nomper des malénreus,  
 De touz li plus meséureus:  
 En moi fet fortune son cors  
 Qui nestre me fist en decors,  
 Si que bien ne me puet venir,  
 Ne à ma fin ne puis venir;  
 Se Diex à ma fin me méist,  
 Aumosne et bonté me féist;  
 Car je hé ma vie de mort,  
 Se je la hé je n'ai pas tort.  
 Et vos, qui estes, biau douz sire?  
 Por Dieu, car vos pléust à dire.  
 Uns hons sui qui ai non Merlin,  
 Qui te propheci et devin,  
 Et te ferai tele amistié,  
 Por ce que j'ai de toi pitié,  
 Que tozjors mès riches seroies,  
 Se tu de cuer servir voloies  
 Jhesu Crist et sa povre gent.  
 Tant te donrai or et argent  
 Que jamès jor ne te faudroit  
 Et Diex à la fin te vaudroit.  
 Tu ses bien que povreté monte,

Assez t'a fet et duel et honte;  
 Por ce le di, se biens avoies,  
 Que les povres amer devroies.  
 A toi les pués espermenter,  
 Qant tu les orras dementer;  
 Li sainz qui malades devient,  
 Set bien qu'à malade covient.  
 Mi sire Merlin, ce sachiez,  
 S'en grant bien estoie atachiez,  
 Que Dieu n'oubliroie-je mie:  
 De ce que j'auroie en baillie,  
 Ne les povres, ainz leur feroie  
 Trestouz les biens que je porroie.  
 Feroies-ore? Oïl voir, sire,  
 Loiaument le vos puis-je dire:  
 En vérité le vos promet.  
 Et j'en ta promesse me met.  
 Or verrai que tu en feras,  
 Et comment tu t'aquiteras,  
 Car je te metrai hors d'essil.  
 Va-t'en au chief de ton cortil  
 Où j'ai un grant tresor séu  
 Desouz la tige d'un séu.  
 Par devers senestre forras,  
 Et maintenant tu trouveras  
 Le grant tresor d'or et d'argent  
 Dont tu feras à ton talent.  
 Bien garde que tu en feras,  
 Que selon ton fet trouveras.  
 Va-t'en, si œuvre sagement,  
 Et garde mon commandement,  
 Et d'ui en un an revendras  
 Ci à moi, si me conteras  
 De ta richece et de ta vie:  
 Garde que tu nu lesses mie.  
 La voiz atant se desvoia  
 Qui le vilain en envoia.  
 Liez de la forest s'en torna,  
 Son asne sanz buche enmena.  
 Sa femme ne se pot tenir,  
 Qant sans buche le vit venir,  
 Qu'el ne li déist: danz vilains,  
 Vielz despis de perece plains,  
 Que mengeront hui vostre enfant?  
 Je les vos metrai au devant,  
 Si vos lerai comme failliz,  
 De Dieu et du monde haïz.  
 Cil en sosriant li dist: Dame,

Vos estes m'amie et ma fame,  
 Si ne me corez pas si seure,  
 Car Diex laboure en petit d'eure:  
 Tenez m'en pès, si ferez bens:  
 Diex me conseillera par tens.  
 Conseillera! voire, comment?  
 Jel voil savoir isnelement,  
 Qu'il n'i aïert point de celée.  
 Avez-vous hui borse trouvée,  
 Ou avez-vous tresor songié?  
 Je n'ai hui béu ne mengié,  
 Ne mi enfant dont plus me poise;  
 De moi ne faz-je pas grant noise:  
 Je n'ai maaïlle ne denier,  
 Ne riens que je puisse engagier,  
 Si avon grant mestier d'avoir.  
 Que pensez-vous? je vois savoir.  
 Tant le tint cort et tant l'esmut,  
 Qu'au derréain li reconnut  
 Ce que la voiz li ot promis;  
 Et cil et cele à tout deus pis  
 Maintenant cele part alerent,  
 Si foïrent tant qu'il troverent  
 Le grant tresor et la richece  
 Dont puis furent en grant hautece.  
 Petit à petit s'atornerent,  
 Por le cri des genz qu'il doterent,  
 Et li vilains deux fois el mois  
 Aloït par contenance au bois,  
 Et tant que du tout le lessa.  
 A l'aise et au repos pensa,  
 Que mal ot souffert dès enfance,  
 Et son avoir fu sa fiance  
 C'onques ne li sovint de rien,  
 Fors d'estre en seulaz et en bien.  
 Mesons et terres acheta,  
 Cel an fist et tant exploita,  
 Que par son avoir fu amez  
 Et preudom et sage clamez.  
 Tant com en povreté fut mis,  
 Sanz parenz fu et sanz amis,  
 Et quant en grant bruit fu montez,  
 Amez fu et emparentez.  
 Chascun au riche s'aparente,  
 Et l'eneure et sert et présente  
 Et li povres est en essil,  
 Chascun le foule et le tient vil.  
 Ainsi est tout mis au lagan,

Que riche et covoitex ont sen,  
 Et li usurier sont amé  
 Por ce que riche sont clamé,  
 Si comme li mondes folie  
 Qui as biens terriens colie.  
 Cit hom fu riche sanz anui,  
 Et maint s'acointierent de lui  
 Tex qui de lui cure n'avoient  
 Quant en povreté le savoient.  
 Au chief de l'an el bois ala,  
 A la voiz el buisson parla.  
 La voiz li respondi : que vels ?  
 N'as-tu assez ? De quoi te dels ?  
 Sire Merlin, oïl por voir,  
 Je sui riche de grant avoir,  
 Mès nue chose vos requier  
 Et pri com à mon ami chier,  
 Que poine et conseil méissiez  
 Tant que prevost me féissiez  
 De cele cité dont je sui.  
 Por ce le te promet que d'ui  
 En quarante jors le seras ;  
 Or t'en va, mès tu revendras  
 D'ui en un an à moi parler  
 Por ton preu querre et demander,  
 Et garde que tu soies tex  
 Que tes œvres reçoive Diex.  
 Cil à son hostel liez s'en vint,  
 Le dit de la voiz li avint  
 Que il fu prevoz et bailliz  
 Au terme qu'ele li ot mis ;  
 Mès onques poi de miex n'en fist,  
 Car là où il seur pot seur fist,  
 Et vers les riches s'aservi  
 Qu'il les douta et les servi.  
 Autrement fere nel' savoit  
 Por l'anemi quel cuer avoit ;  
 Ne de vilain n'est mie gieus,  
 Car comme bos est venimeus.  
 Einsi à son droit s'aquita,  
 Que de bien fere se gita.  
 Quant plus monta, plus fu vilains,  
 Seurquidez, fel et d'ire plains,  
 Si que Diex du tout oublia  
 Par l'orgueil où il se lia :  
 N'onques puis n'ot de povres cure,  
 Ainz ot vers els volenté dure.  
 Le povre qu'ot à compaignon

Ot en despit com fel gaignon :  
 Toutes les foiz qu'il le voioit,  
 De povreté li amenoit  
 Remembrance si qu'à nul fuer  
 Nu pooit amer en son cuer.  
 Einsi comme fol se maintint,  
 Et tant que au chief de l'an vint,  
 Si pensa qu'à la voiz iroit  
 Por savoir qu'ele li donroit :  
 Du sien voloit encor avoir,  
 Fust à folie ou à savoir,  
 Si comme sa grant gloutonie  
 Qui n'ert pas encor aemplic.  
 A grant feste et à grant noblois  
 S'en ala lendemain el bois :  
 Sa compaignie arester fist,  
 Et seul lez le buisson se mist.  
 Si commença haut à crier :  
 Merlin, car vien à moi parler,  
 Haste-toi, la téue merci,  
 Car je ne puis demorer ci.  
 La Voiz vint et dist : Comment est ?  
 Il m'est mout bien et bien me plect  
 La grant enneur où tu m'as mis,  
 Dont à tozjors sui tes amis ;  
 Mès encore te voil prier  
 Que tu tant me voilles aidier  
 Que ma fille soit mariée  
 Au filz au prevost d'Aquilée ;  
 Et de mon filz faites evesques  
 De la cité de Blandebesque,  
 Car li evesques est or mors.  
 C'est mes solaz et mes confors  
 Que de mon filz et de ma fille  
 Qui son parenté pas n'aville.  
 Se ces deus choses me fesoies,  
 A tozjors mes amis seroies ;  
 Pas ne m'en feroie proier,  
 Se bien le cuidoie emploier.  
 Par foi tu l'emploieras bien,  
 Car en ma fille a moult de bien ;  
 Preuz est et sage et bele assez,  
 Et mon filz si est bien letrez  
 Et en touz livres bien lisanz,  
 Et si a bien vingt et cinq anz.  
 Or t'en va, si pense de toi,  
 Et je ces deus choses t'otroi :  
 Dedenz quarante jors entiers

Avendra ce que tu requiers ,  
 Et d'ui en un an ci seras .  
 Si garde que tu requerras ;  
 Musart est cil qui tant s'endete  
 Qu'il ne puet aquiter sa dete.  
 Li vilains s'emparti atant  
 La voie es esperons hastant.  
 Mout fu liez et grant feste fist  
 De ce que cele voiz li dist.  
 Sa femme , qant ele le sot ,  
 Avecques lui grant joie en ot.  
 Au terme leur avint tout droit  
 Ce que la voiz promis avoit  
 Du filz et de la fille ensemble.  
 Le vilain qui ot cuer de tremble  
 Et rouz et plein de gloutonie,  
 N'oublia pas sa vilonie  
 Por l'onneur que Diex li fesoit.  
 En touz max fere s'atoit,  
 Et touz biens à fere eschiva,  
 Et barat et guile aviva ,  
 Si comme pechié le menoit  
 A ce que mener le devoit.  
 En grant hautece fu cel an ,  
 Riche d'avoir , povre de sen ;  
 Car comme fox ne cuidoit mie  
 Que jamès eüst autre vie.  
 Qant plus ot et qant plus monta ,  
 Mains en servi Dieu et ama ,  
 Qu'il estoit vilains de nature  
 Et enforciez de norreture ,  
 Et par ce li sers s'aquitoit  
 Du fiens qui el cuer li estoit.  
 Autre chose n'en pooit trere ,  
 A son droit li convenoit fere ;  
 Ne nus n'oste ne ne retret  
 De son sac fors ce qui i est.  
 Se bien i a , bien i puet prendre ,  
 Autre chose n'i puet-on prendre ,  
 Si comme vilains s'aquita ,  
 Mès par cel aquit s'endeta ,  
 Por ce qu'à Dieu gré ne savoit  
 Des biens que prestez li avoit ,  
 Tant qu'une nuit dist à sa fame :  
 Demain me covient aler , Dame ,  
 Parler à la voiz en cel bois ;  
 Mès volentiers mie n'i vois ,  
 Car je n'ai mès de lui que fere ,

Si n'ai cure de son repere.  
 Sire , ne porqant i alez ,  
 Et sagement à li parlez ,  
 Si li dites bien à estrous :  
 Sire , je n'ai mestier de vous ,  
 Je m'en puis bien à tant tenir ,  
 Il m'ennuie ça tant venir ;  
 A itant si vos en partez ,  
 Que lui ne autre ne doutez.  
 Le vilain fol à lendemain  
 A mal eur se leva main :  
 De beles robes s'atorna ,  
 Montez vers le bois s'en torna ,  
 Dui sergant avec lui monterent  
 Qui compaignie li porterent.  
 El buisson tout seul se bounta ,  
 D'apeler la voiz se hasta ,  
 Et cria : Merlot' , où es-tu ?  
 Je t'ai ci grant piece atendu ;  
 Vien avant et si te dirai  
 Mon talent et puis m'en irai.  
 La voiz tout maintenant li vint  
 Qui desus un arbre se tint ,  
 Si li dist : Ça sui encrochiez  
 Qu'a pou que ne sui escachiez  
 De ton cheval des piez devant :  
 Or me di que tu vas querant.  
 A toi sui venuz congié prendre ,  
 Et si te vois bien fere entendre  
 Que la poine ne puis soffrir  
 De tant aler ne de venir ;  
 Mout m'ennuie , si n'ai mestier  
 D'autrui requerre ne proier :  
 Nule riens plus ne te demant ,  
 Je m'en vois , à Dieu te commant.  
 Vilain décéu , vilain las !  
 Et ja ne t'ennuioit-il pas  
 Qant tu chascun jor i venoies ,  
 Et trotant ton asne menoies  
 Por charchier de busche et puis vendre  
 Por ta lasse de vie prendre ,  
 Dont mout estoies esgarez  
 Mainte foiz et moult explorez ?  
 Or i venoies noblement  
 L'an une foiz à ton talent  
 Emportoies à ton devis.  
 Or ai bien employé et mis  
 Les servises que je t'ai fés

Dont tu es rogues et seurlés,  
 Si que pas ne cuides por voir  
 Que jamès puisses mal avoir,  
 Comme fol vilain seurquidiez,  
 Plain de mal et de bien vuidiez.  
 Qui vilain aluche et aqueut,  
 La verge qui puis le bat quent.  
 Au premier qant à moi parlas,  
 Mon seigneur Merlin m'apelas  
 Comme povre simple et de pès,  
 Et puis sire Merlin après,  
 Et puis Merlin et puis Merlot;  
 Si comme ton fol cuer ne pot  
 Essaucier mon non et m'onneur,  
 Ainz m'apelas par le meneur.  
 Vilain rude de mal savoir,  
 Qui as éu le grant avoir  
 Que Dame Dieu t'avoit presté,  
 N'onques ne l'en féis honté,  
 Ainz as esté glouz d'autrui biens  
 Tout autresi comme li chiens  
 Qui se refet de la charoigne:  
 Tozjors est sus et tozjors groigne,  
 Por ce que plus n'en puet mengier,  
 N'as autres ne la velt lessier,  
 Jà soit ce qu'il en soit toz plains.  
 Autretel os-tu fet, vilains;  
 Les granz biens gaster ne pooies,  
 Ne bonté fere n'en voloies.  
 Vilain asuier, vilain asnin,  
 De toutes graces orphelin,  
 Vilain es et vilain seras,  
 Et à ton labor reveudras.  
 Des biens où je t'avoie mis  
 Tiex t'en vas com tu i venis  
 Au premier qant te dementoies  
 Des povretez où tu estoies.  
 Tu m'as décéu comme faus,  
 Mès par toi revendra li maus,  
 Par ton orgueil, par ta rancune  
 Charras en la roe fortune;  
 El fiens desouz ilec morras  
 Que relever ne te porras.

Le vilain qui de riens douta,  
 Hors de la forest se bouta:  
 A la montance d'une noiz  
 Ne prisa le dit de la voiz.  
 A gabois le torns et tint,

A sa nature se maintint  
 Qu'il ne la volt pas estrangier  
 De lui, ne son fol cuer changier.  
 Le vilain de mal assui,  
 Qu'à grant poine et à grant anui  
 Reson qui rent et qui s'aquite  
 Vers chascun selon sa mérite,  
 A ce vilain droit s'aquita,  
 Qu'an néent le mist et gita:  
 Si vous deviserai comment.  
 De sa fille premierement  
 Avint que morte fu sanz hoir,  
 Si ot perdu fille et avoir.  
 Son filz qui evesques estoit,  
 Où toute sa fiance avoit,  
 Morut après prochainement.  
 Corouciez en fu durement,  
 Mès à bien fere ne s'esmut,  
 Ne sa malvestié ne connut,  
 Tant que li sires de la terre,  
 Qui ot affiné une guerre,  
 Vint en la vile où cil manoit,  
 Qui ses baillies maintenait.  
 Maintenant li fu encusez  
 Qu'or et argent avoit assez  
 Plus que demi cil de Quaors,  
 Li vilains sales et aors,  
 Tant que devant lui le manda,  
 De son avoir li demanda;  
 Et cil qui donner ne savoit  
 Dist au seigneur que riens n'avoit.  
 Et li sires qui s'aira,  
 Por ce que il menti, jura  
 Que jà riens ne li remaindroit,  
 Einsi voir disant le feroit.  
 Si li toli qanke il ot,  
 Que desgéuner ne se pot  
 De chose qui li remansist.  
 Einsi li plot à fere et sist,  
 Bien avera la prophecie.  
 De li ne sai plus que vos die,  
 Mès tant refist et exploita,  
 Que de rechief asne acheta,  
 Et el bois ala chascun jor,  
 Einsi revint en son labor  
 Qui mout le tainst et acora,  
 Des mains sans le cuer labora;  
 Li cuers à sa perte pensoit,

Einsi de deus parz laboroit.  
En ses labors sa vie usa  
Por son fol cuer qui l'atisa.

Einsi orgueil peine son oste  
Qui d'onneur et de joie l'oste,  
Et li mue sa grant hautece  
En povreté et en tristece.  
Si est fol qui à lui se tient,  
Quant à tel guerredon en vient;  
Et por ce chastier se doivent  
Li endormi qui se deçoivent,  
Quant Diex de povreté les tret,  
Et es biens du monde les met.  
Quant montez sont si se desroient,  
Et Dieu de sa bonté gerroient,  
Si comme cil fol vilain fist  
Qui des granz biens où Diex le mist  
Ne fist pas ce que fere dut  
Par son orgueil qui le déçut,  
Si qu'à néent fu amenez.  
Et por ce garder vos devez,  
Vos qui des biens Dieu estes riches,  
Que vos vers lui ne soies chiches,  
Ainz les repartez largement;  
Ou bien sachiez certainement  
Que du plus serez-vous au mains  
Ausi comme fu cist vilains  
Qui se remist en l'asnerie.

Cil fet son preu qui s'umelie,  
Et qui à celui gerredonne  
Les biens qu'en cest siecle li donne.

598 vers.

*Explicit.*

DE L'ERMITE QUI S'ENYVRA,

ou

D'UN ERMITE QUI TUA SON COMPERE

ET JUT A SA COMMERE.

Viez pechiez fet novele honte,  
Si com le proverbe raconte :  
Por ce nos Devon descharchier  
De pechié que trop avon chier.

Qui son pechié norrist et queuve,  
L'aiguel ressemble qui la leuve  
Herberge, si ne garde l'eure  
Que ele l'ocit et deveure.  
Tout autretel fet li pechiez,  
Quant il est en fol embuschiez :  
Quant le plus velt et plus l'aqueut,  
Plus s'i délite et plus le veut,  
Tant qu'il l'oublie et qu'il s'endort,  
Que li pechiez le tret à mort.  
A mort que jà ne li faudra,  
Ne jamès bien ne li vendra  
Qu'en face por li geter hors,  
Qu'enfer ne li arde le cors.  
Por ce lo-je tant com vivons,  
Que noz cuers de bien avivons,  
Et par confession veraie  
Façons et le pont et la voie  
Par quoi à Dieu puisson venir  
Quant il nos covendra morir.  
Nostre Sire si donne et met  
Sa grace là où il li plect,  
Et sa grace de légier vient  
A cil qui confession tient.  
Par la sainte confession  
Vient la bonne rémission,  
Et par la bonne repentance  
Si i devons avoir fiance,  
Et de près garder et tenir  
Quant tel preu nos en puet venir.  
Cil qui vers Dame Dieu mesprent,  
Tout maintenant qu'il se repent  
De son pechié et il s'amende,  
Et fet par penitance amende,  
Tantost cil son meffet efface,  
Mès que cil plus ne li mefface,  
Et se porpent chascun por soi :  
Car tuit sommes mis à l'essai,  
Et par l'essai nos jugera  
Diex qui à juger nos aura :  
Si lo que nos nos porvoions  
Ains que le jugement aions.  
Ci après vos dirai la vie  
D'un Hermite qui grant envie  
Avoit mout de s'ame sauver,  
Et bien se voloit esprover  
A abstinence tant que s'ame  
Fust de son cors mestresse et dame.